

P R I V I L E G I V M R E G I S H I S P A N I A R V M



PHILIPS blijder gratien Godts, Coeninck van Castilien, van Leon, van Arragon, van Nauarre, van Naples, van Secilien, van Sardayne, vanden Eylanden Indien, ende vasten Landen der Zee Oceane, Ertzhertoge van Oostenryck, Hertoge van Bourgoingnen, van Lothryck, van Brabant, van Limborch, ende van Luxemborch, van Geldre, ende van Milanen. Graue van Habsbourg, van Vlaenderen, van Arthois, van Bourgoingnen, Palsgraue, ende van Henegauwe, van Hollandt, van Zeelandt, van Namen, ende van Zutphen. Prince van Zyvaue Marckgraue des Heylichs Rycx, Heere vā Vriesslandt, van Salins, van Mechelen, Vander Stadt, steden ende Landen van VVtrecht, Oueryssel, ende Groeningen Ende Dominateur in Asien ende in Aftrycken, Allen ghenen, die desen onsen brieff sullen sien oft hooren lesen, saluyt. Doen te vvetene, Dat vvy ontfangen hebben die oetmoedige supplicatie van Franciscus Hoogenberghe, Schilder, vvonende binnen der Stadt van Cuelen, Inhoudende, hoe dat hy suppliant, tot zijnen groten coste, moeyte, ende arbeyt, heeft doen graueren, oft steken in copere platē, die figuren vande principaelste steden der Vverelt, die hy heeft cunnen gerecouureren, hebbēde deselue binnen der Stadt van Cuelen, in een volumen doen drucken, metter descriptie vander gelegenheyt ende situatie van elcker stadt. Ende hebben tvoorf Boeck oft volumen nader handt doen visiteren, by Heeren ende Meesteren Sebastianen Baer, Plebaen der Kercken van onser Lieuer Vrouwen binnen Antwerpen, Soude tselue gherne doen drucken ende vercoopen, by sulcken gesvoren drucker ende Boeckuercooper binnen onsen Landen van Brabant geseten als hem goetduncken sal, Maer en soude tselue niet dorren noch moegen doen, obsterende onse ordinantien ter contrarien, Oock vresende dat yemandt anders den voors boeck soude geraecken na te drucken oft te conterfeyten, vvarduere hy van zijnder coste, moyete, ende aerbeyt gefrustreert soude zijn. Ten vware dat hem hierinne vvorde versien met onse opene brieuen van Ottroye. Inhoudende clause van Interdictie voerden tijt van zestthien Jaeren naestcommende. So eest, dat vvy desaecken voors ouergemerckt, Genegen vresende ter beden vanden voors Franciscus Hoogenberghe suppliant, denseluen hebbende gegundt, geottroyert, ende geconsenteert, Gunnen, ottroyeren, ende consenteren, vvyt sonderling gratien by desen onsen brieue, dat hy tvoors boeck oft volumen, nauolgende de correctie daerop gedaen, soo verre daer eenige geschiedt is, by sulcken gesvoren drucker oft boeck vercooper binnen onsen voors Lande van Brabant geseten, als hem goetduncken ende gelieuen sal, sal moegen doen drucken, vercoopen, ende distribueren, alomme binnen denselue onsen Lande van Brabant, ende van Ouermaze, daert hem goetduncken ende gelieuen sal, Sonder daromme tegen ons, oft onse ordinantien verboden, ende placaten eenichlins te misdoene. Behoudelick dat de voorsch. suppliant schuldich sal zijn hem in desen te Regulieren nauolgende der ordantie opt stuck vander printe gemaect, ende ten eynde dat de suppliant vanden costende moyere by hem alreede gedaen, ende alnoch te doene niet gefrustreert en vvorde. So hebben vvy geinterdiceert ende verboden, Interdiceren ende verbieden by desen, allen anderē van vvat state, qualiteyt oft conditie zy zijn, den voors boeck oft volumen na te drucken oft contrafeyten, oft elders gedrukt ende gecontrafeyt zijnde, te vercoopen binnen onsen voors Lande van Brabant, ende van Ouermaze, gedurende den tijt ende termijn van thien Jaeren naestcommende, Ten vware by vveten ende expressen consente vanden suppliant, Op pene van telcker Reyden zy beuonden zullen vvorden gedaen te hebbene ter contrarien, te verliesen allen dextplarien ende boecken, also by hen gedrukt ende gecontrafeyt, ende bouē dien drie Carolusgulden voor elcken boeck, deselue peyne tappliceren een derdendeel tonfen proffyte, dander derdendeel aenden officier die daer af dexecutie doen sal, ende het derdendeel tot behoef van den suppliant. Ontbieden daerom ende beuelen onsen zeer lieuen ende getrovven Cancellier, endeden anderen lieden van onsen Rade in Brabant, Meyer van Loeuene, Amptman van Bruesele, Schoutteten van Antwerpen ende vanden Bossche, ende allen anderē onsen, ende den smaelre Heeren, Rechteren, Iusticieren, Officieren ende ondersaten vns voors Lants van Brabant ende van Ouermaze, vvyen dat aengaen sal moegen, heure Stedthouderen, endeeenen yeglicken van hen, so hem toebehoiren sal, dat zy den voors suppliant van dese onse gratie, ottroye, ende consente, ende van allen den Inhouden van desen, doen laten, ende gedoogen, Rastelijck ende vredelijck genieten ende gebrucken, sonder hem darinne te doene oft te laten geschieden eenich hinder, letsel, oft moyenisse, ter contrarien, Procederende ende doende procederen tegen die transgresseurs ende ouertreders van desen, by den pene hier bouen geruert, sonder dissimulatie. VVant ons also gelieft. Des torcunden hebben vvy onsen Segel hieran doen hangen Gegeuen in onser Stadt van Bruesele, den XXII. dach der Maent van Nouember, int Jaer ons Heeren M. D. LXXIII. van onsen Rijcken Spaignen, Secilien, &c. XIX. Ende van Neapels &c. XXI.

Vidit, & approbavit D. Sebastianus Baer Delphius, Plebanus &
Canonicus Ecclesiae Cathedralis B. Mariae virginis Antuerpien.